



**Aqqusinernik aqqissuussinernut pilersitsisarnernullu, ilisimalikkanik ataqatigiissaariitigaluni katersuivimmik, kommunillu susassaqarfimmi suliniutaannik ikorfartuisarfimmik aqqusineqarnikkut ingerlatsivimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Hermann Berthelsen, Siumut)  
(Siullermeerneqarnera)

Immitsinnut ungasilluta najugaqarnerput silallu pissusaa allanngorartuartoq pissutaallutik angallanneq ilungersunartorsiorfiusinnaasarpoq. Tamatta tamanna misigisarparput timmisartussatilluta imaluunniit imaatigut angalassatilluta.

Aamma taamatut ilungersunartorsioartarnissaq ingerlaannassaaq najuaqarfiit assigiinngitsut akornanni aqqusinniussagaluarutta. Taamaattumik pingaarutilerujussuuvoq eqqarsarluarnissarput.

Demokraatit aallarteqqaarmatali Sisimiuniit Kangerlussuarmut aqqusinniortoqarnissaa tapersersortuarsimavarput aamma suli tapersorsorparput. Isumaqarpugulli erseqqissumik oqaatigisariaqartoq suliniut taamaattoq piviusunngortinniarneqassagaluarpat akisussaaffik annerpaaq kommunimiittariaqassammat. Kommunit imminnut aqupput tamannalu ataqqisariaqarparput.

Aamma taamatut kujataani najukkat assigiinngitsut akornanni aqqusinniortoqarsinnaavoq. Sulili isumaqarpugut siunnersuuteqartussat siulliullutik aamma siunnersuuteqarnissamut pisussaaffik kommuuniniittoq.

Maluginiarparput Naalakkersuisut allannguutissamik siunnersuuteqarsimasut, Naalakkersuisut peqquneqartussanngorlugit najugaqarfiit akornanni aqqusiniliortitertoqarsinnaananeranut ilisimasanik katersinissamut atatillugu kommuninik suleqateqaqqullugit.

Demokraatini tunngaviummik allannguutissatut siunnersuutigineqartoq ilalerparput innersuullugulu Sanaartornermut Ataatsimiititaliamut ingerlateqqinneqassasoq suliareqqitassanngorlugu.